

Karishma Shyam Ka | By Naren Soni

Sachcha Hai Mere Shyam Ka Darbar Dekh Lo
Aankhon Se Apne Jaake Chamatkar Dekh Lo

Darbar Mere Shyam Ka Mashoor Bahut Tha
Ye Toote Foote Raaste Aur Door Bahut Tha
Lekar Muradein Chal Pada Brahman Ka Parivaar
SantaaN Ki Thi Kaamna Aur Baba Se Tha Pyar
Chalte Chalte Raaste Mein Raat Ho Gayi
Ek Ghatna Unke Saath Akasmaat Ho Gayi
Brahman Ko Maar Dala Daakuo Ne Loot Kar
Brahman Ki Patni Rone Lagi Phoot Phoot Kar
Brahman Ki Patni Roye Zaar Zaar Dekh Lo
Aankhon Se Apne Jaake Chamatkar Dekh Lo

Aayi Thi Tere Dwar Tujhe Baap Samajh Kar
Maati Mein Mila Diya Mujhe Khaak Samajh Kar
Chhaati Ko Lagi Peetne Haay Raam Mere Ram
Dunya Ujad Gayi Meri Jhootha Hai Baba Shyam
Aayi Thi Lene Lal Aur Suhag Lurta Hai
Teri Aankhon Ke Saamne Mera Bhaag Phoota Hai
Bante Ho Dayavaan Aur Daya Ka Naam Nahi Hai
Patthar Hai Mera Shyam Tu Bhagwan Nahi Hai
Bakne Lagi Wo Gaaliyan Hazaar Dekh Lo
Aankhon Se Apne Jaake Chamatkar Dekh Lo

Haatho Se Apne Baal Ko Wo Nochne Lagi
Zinda Hoon Kisliye Main KHud Ko Kosne Lagi
Sunle Meri Pukar Duniya Banane Waale
Dharti Ka Bojh Samajh Ke Duniya Se Utha Le
Patthar Pada Tha Saamne Jhatke Se Uthaya
Sar Phodne Chali Hui Shri Shyam Ki Maya
Itni Si Der Mein Wahan Toofan Aa Gaya
Leele Ghode Pe Baith Baba Shyam Aa Gaya
Sunta Hai Apne Bhakt Ki Pukar Dekh Lo
Aankhon Se Apne Jaake Chamatkar Dekh Lo

Baba Ko Dekh Samne Charno Mein Gir Gayi
Mujhko Bacha Le Shyam Main Bemaut Mar Gayi
Beti Ke Aansu Ponchhe Aur Brahman Ko Jilaya
Gussa Na Karo Beti Zara Der Se Aaya
Kuch Din Baad Teri God Bharegi
Ye Ashirwad Mera Bahut Mauj Karegi
Banwari Aisa Dev Jo Murdo Ko Jiya De
Jo Kaam Koi Kar Na Saka Kar Ke Dikha De
Karta Hai Apne Bhakt Se Wo Pyar Dekh Lo
Aankhon Se Apne Jaake Chamatkar Dekh Lo

<https://bhaktivandana.com/lyrics/%e0%a4%95%e0%a4%b0%e0%a4%bf%e0%a4%b6%e0%a5%8d%e0%a4%ae%e0%a4%be-%e0%a4%b6%e0%a5%8d%e0%a4%af%e0%a4%be%e0%a4%ae-%e0%a4%95%e0%a4%be-by-naren-soni/>